

157. sjednica Vlade Federacije BiH

Mostar, 21.09.2010.

STRATEGIJE RAZVOJA BiH I FBiH

Vlada Federacije BiH podržala je danas Strategiju razvoja Bosne i Hercegovine i Strategiju socijalnog uključivanja Bosne i Hercegovine, te izrazila punu opredjeljenost i rješenost da pruži puni doprinos na implementaciji strateških dokumenata BiH.

Vlada FBiH podržava prijedlog da se nakon usvajanja strategija izradi kompletna analitička podloga za Financijski okvir za implementaciju strategija. Takva analitička podloga će uključivati kvantifikaciju potrebnih investicija po pojedinim ciljevima i podciljevima, te izvorima financiranja, radi praćenja provođenja strategija, a vodeći računa o postojećim makroekonomskim projekcijama. Podržan je i prijedlog da se izradi Okvir za implementaciju strategija, monitoring plan i plan načina izvještavanja u roku od tri mjeseca od usvajanja strategija prema metodologiji izrade strategija. Usvajaju se akcioni planovi ministarstava i institucija FBiH kojim će biti podržana implementacija navedenih strategija. Vlada je zadužila federalna ministarstva da vrše monitoring, evaluaciju i izvještavanje o urađenim aktivnostima iz akcionih planova i godišnje izvještaje dostavljaju Federalnom zavodu za programiranje razvoja. Zaključeno je da kantonalne vlade treba da urade svoje akcione planove kojima će strategije biti podržane na kantonalnom i lokalnom nivou, te da formiraju implementacione jedinice koje će vršiti monitoring, evaluaciju i izvještavanje o urađenim aktivnostima na kantonalnom nivou i godišnje izvještaje dostavljaju Federalnom zavodu za programiranje razvoja. Federalni zavod za programiranje razvoja će praviti godišnje zbirne izvještaje.

Polazeći od ovih dokumenata, Vlada FBiH usvojila je danas i Strategiju razvoja Federacije Bosne i Hercegovine za period od 2010. do 2020. godine. Zaduženja data federalnim ministarstvima i kantonalnim vladama kada je riječ o strategijama na nivou BiH, vrijede i u slučaju implementacije Strategije razvoja FBiH.

Naslonjena na srednjoročne strateške ciljeve Razvojne strategije BiH i Strategije socijalnog uključivanja BiH, Strategija razvoja Federacije BiH, a na osnovu postavljene vizije i raspoloživih faktora razvoja, specificira aktivnosti na federalnom nivou za realizaciju strateških opredjeljenja u periodu 2010.-2020. godine

Prioritetni ciljevi na nivou Federacije BiH su fiskalna održivost i javne finansije, razvoj finansijskih tržišta i razvoj finansijskih institucija u FBiH, reforma sektora javnih finansija (porezna reforma), ojačani fiskalni kapaciteti lokalnih zajednica, i smanjenje administrativne korupcije.